

HOMENAHE NA MAYBELINE ARENDS-CROES



ORANJESTAD(AAN) -- Durante un conferencia na Biblioteca Nacional, a duna splicacion di e obra "Magia di Fantasia" skirbi pa Lilia Caster-Luidens, dedica na Maybeline Arends-Croes.

Atan Lee a splica cu Maybeline den su carera como maestra di musica y canto, no conoce e palabra NO. E por ta cansa, pero toch e tin tempo pa un y tur sea grandi of chikito.

Despues di 28 aña como maestra, lo organisa un gran homenahe na su honor.

Lilia Caster-Luidens a ser escogi pa inventa y produci un obra na Maybeline su honor.

Un titulo asina bunita "Magia di Fantasia", ta cuadra realmente cu e caracter alegre y unico di tanta Maybeline, manera su alumnonan ta yame.

Su cooperacion ariba tur tereno ta numeroso tanto pa nos propio hendenan y bishitantenan for di esun poco importante como esnan mas importante manera Su Mahestad La Reina.

Cu inauguracion oficial di nos Himno na Maart 1976, Maybeline tabatin e honor di a dirigi e coro cu a canta esaki, pa mustra henter mundo cu apesar cu nos ta chikito den tamaño, nos ta orguyoso y nos por bati ariba nos pecho di tin nos propio Himno.

Maybeline a ricibi hopi respèt y premion for tur skina di nos isla y a ser condecora tambe den ordo Ridder van Oranje Nassau pa Gobernador den nomber di Su Mahestad La Reina.

Maybeline no ta conoci pa su profesion di canto y baile, pero ta un ser humano excepcional cu su curason habri tur ora bay pa su pueblo. Maybeline su sonrisa ta contagioso y su carisma ta esun cu ta hacie mas stima pa henter nos pueblo. Ojala cu e Hada Madrina por tover mas Maybeline pa Aruba.